



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 828, Datë 02.09.2021

**“PËR MBYLLJEN E PROCEDURËS SË HETIMIT TË THELLUAR NË
TREGUN E IMPORTIT DHE TREGTIMIT ME SHUMICË TË
MASKAVE, NË TREGUN E IMPORTIT, PRODHIMIT DHE
TREGTIMIT ME SHUMICË TË ALKOOLEVE DHE
GELDEZINFEKTUES, NË TREGUN E IMPORTIT DHE TREGTIMIT
ME SHUMICË TË TERMOMETRAVE DHE MIRATIMIN E
ANGAZHIMEVE SI TË DETYRUESHME NË FORMËN E KUSHTEVE
DHE DETYRIMEVE PËR NDËRMARRJEN FARMA NET ALBANIA
SHPK”**

Komisioni i Konkurrencës me pjesëmarrjen e:

Znj.	Juliana LATIFI	Kryetar
Znj.	Leida MATJA	Zv/Kryetar
Z.	Eduard YPI	Anëtar
Znj.	Adriana BERBERI	Anëtar
Z.	Denar BIBA	Anëtar

Në mbledhjen e tij të datës 02.09.2021, shqyrtoi çështjen me:

Objekti: Mbyllja e procedurave të hetimit të thelluar në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe geldezinfektues, në tregun e importit dhe tregtimit me shumicë të termometrave dhe miratimi i angazhimeve si të detyrueshme në formën e kushteve dhe detyrimeve për ndërmarrjen Farma Net Albania SHPK.

Baza Ligjore: Neni 24 germa (d), neni 26, neni 43, pika (5) dhe neni 45, pika (2) të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Mbi procedurat e angazhimeve”.

Komisioni i Konkurrencës pas shqyrtimit të:

- Raportit të hetimit të thelluar në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe geldezinfektues, në tregun e importit dhe tregtimit me shumicë të termometrave;
- Relacionit të Sekretarit të Përgjithshëm të Autoritetit të Konkurrencës mbi raportin e hetimit të thelluar në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe geldezinfektues, në tregun e importit dhe tregtimit me shumicë të termometrave;

- Shkresën mbi angazhimet e ndërmarrjes Farma Net Albania SHPK protokolluar në AK me shkresën nr. 293/2 prot., datë 21.06.2021.

VËREN SE:

I. Procedura e ndjekur

1. Komisioni i Konkurrencës me Vendimin nr. 684, datë 18.03.2020 “Për hapjen e hetimit paraprak në tregun e shitjes me shumicë dhe me pakicë të materialeve paramjekësore”, vendosi hapjen e procedurës së hetimit paraprak në tregun e shitjes me shumicë dhe me pakicë të materialeve paramjekësore, për të parë nëse ka, ose jo, shenja të kufizimit të konkurrencës.
2. Komisioni i Konkurrencës me Vendimin nr. 685, datë 18.03.2020 “Për marrjen e masës së përkohshme për vendosjen e konkurrencës në tregun e shitjes me shumicë dhe me pakicë të materialeve paramjekësore”, vendosi:
 - i. Marrjen e masës së përkohshme si vijon:
 - a. Ndalimin e sjelljes së ndërmarrjeve që veprojnë në rrjetin e tregtimit me shumicë dhe pakicë (importues, depo farmaceutike dhe farmaci) të materialeve paramjekësore, të cilat në mënyrë të drejtpërdrejtë apo të tërthortë vendosin çmime apo kushte të padrejta tregtimi.
 - b. Me qëllim shmangien e abuzimit në zinxhirin e tregtimit, detyrimin e të gjitha ndërmarrjeve që veprojnë në tregun e importit dhe shitjes me shumicë të materialeve paramjekësore të jenë transparent në vendosjen e çmimit të shitjes së materialeve dezinfektant, alkool dhe maska.
 - c. Aplikimin e çmimeve të orientuara drejt kostos dhe publikimit e tyre në faqet zyrtare të internetit të ndërmarrjeve apo në kanalet e tjera të komunikimit.
 - ii. Masa e përkohshme merret për një periudhë kohore deri në përfundim të procedurës hetimore.
 - d. Në rast të moszbatimit të vendimit për masa të përkohshme të cituara në pikën (1) të këtij vendimi, ndërmarrjet që do të konstatohen në shkelje ndëshkohen me gjobë deri në 10 % të xhiros vjetore për shkelje të rëndë të konkurrencës në zbatim të nenit 74, pika 1, germa b) të ligjit nr. 9121/2003.
3. Komisioni i Konkurrencës, me Vendimin nr. 716, datë 15.10.2020 “Për hapjen procedurës së hetimit të thelluar ndaj disa ndërmarrjeve në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe gel-dezinfektues, në tregun e importit dhe tregtimit me shumicë të termometrave” vendosi hapjen e procedurës së hetimit të thelluar në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe gel-dezinfektues, në tregun e importit dhe tregtimit me shumicë të termometrave.
4. Komisioni i Konkurrencës me Vendim nr. 717, datë 15.10.2020 vendosi “Për vendosje gjobe dhe dhënien e disa detyrimeve ndaj ndërmarrjeve CFO Pharma SHPK, Delta Pharma – AL SHPK, Pharma One SHPK, Intermed SHPK, Alfarmakos SHPK, Trimed SHPK, Megapharma SHPK, Evita SHPK, IMI – Farma SHPK, Fufarma SHA, Medicamenta SHPK, Mini Invest Albania SHPK, Delta Med SHPK, O.E.S Distrimed SHPK, Montal

SHPK, MSE SHPK, Farma Net Albania SHPK, Tresi – Farm SHPK, Incomed SHPK, Florifarma SHPK, Lekli SHPK, Dial – ALB SHPK, Sirol 2008 SHPK, Aquila Group SHPK në tregun e shitjes me shumicë të materialeve paramjekësore, për mos zbatimin e masës së përkohshme të Vendimit të Komisionit të Konkurrencës nr. 685, datë 18.03.2020 “Për marrjen e masës së përkohshme për vendosjen e konkurrencës në tregun e shitjes me shumicë dhe me pakicë të materialeve paramjekësore””.

5. Në zbatim të pikës IV të Vendimit nr. 717, datë 15.10.2020, bazuar në Autorizimet e Komisionit të Konkurrencës nr. 110/44 datë 24.8.2020 dhe nr. 110/50 datë 19.10.2020, u krye inspektim pranë ndërmarrjes Farma Net Albania SHPK.
6. Të dhënat e siguruar në formë fizike dhe elektronike, u përpunuan nga inspektorët e Autoritetit të Konkurrencës, duke krahasuar deklaratat e subjektit me shit-blerjet e realizuara nga këto ndërmarrje. Bazuar në të dhënat e administruara gjatë inspektimit, Komisioni i Konkurrencës u shpreh me vendimin nr. 745, datë 19.11.2020 “Mbi zbatimin e pikës IV të Vendimit të Komisionit të Konkurrencës nr. 717, datë 15.10.2020 për ndërmarrjen “FARMA NET ALBANIA” SHPK”.
7. Komisioni i Konkurrencës, me Vendimin nr. 725, datë 09.11.2020 “Për një ndryshim në Vendimin e Komisionit të Konkurrencës nr. 716, datë 15.10.2020 “Për hapjen procedurës së hetimit të thelluar ndaj disa ndërmarrjeve në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe gel-dezinfektues, në tregun e importit dhe tregtimit me shumicë të termometrave””, vendosi. “Hetimi i Thelluar do të përfshijë periudhën kohore nga 01.11.2019 deri në 31.12.2020”.
8. Për efekt të analizës së konkurrencës dhe sjelljes së ndërmarrjeve periudha hetimore është ndarë në tre fasha kohore të cilat janë: 1 nëntor 2019 - 29 shkurt 2020, 1 mars 2020 - 31 gusht 2020 dhe 1 shtator 2020 - 31 dhjetor 2020.
 - Në lidhje me këtë ndarje sqarojmë si më poshtë vijon:
 - i. 1 nëntor 2019 - 29 shkurt 2020 – është periudha përpara fillimit të pandemisë COVID-19;
 - ii. 1 mars 2020 - 31 gusht 2020 - është periudha e hapjes së procedurës së hetimit paraprak dhe marrjes së masës së përkohshme;
 - iii. 1 shtator 2020 - 31 dhjetor 2020 - është periudha e vlerësimit të sjelljes së shoqërive në hetim të cilat tregtojnë produkte në tregun e importit dhe tregtimit me shumicë të maskave, tregun e importit, prodhimit dhe tregtimit me shumicë të alkooleve dhe gel dezinfektues si dhe në tregun e importit dhe tregtimit me shumicë të termometrave.
9. Për sa më sipër, përcaktimi i këtyre fashiave ndihmon në vlerësimin dhe krahasimin e sjelljes së ndërmarrjeve në hetim në kohën para, gjatë dhe pas dhënies së masës së përkohshme.
10. Bazuar në Udhëzimin e përbashkët të Ministrisë së Shëndetësisë dhe Mbrojtjes Sociale dhe APP nr. 296, datë 06.05.2020 “Për përcaktimin e mallrave dhe shërbimeve për përbalimin e situatës së krijuar nga epidemia COVID-19”, është përcaktuar lista e mallrave dhe shërbimeve për përbalimin e kësaj situate dhe në këtë listë përfshihen, maskat, alkooli, gel-

dezinfektues për duar dhe termometër infrared.

11. Metodologjia e përdorur është Materiali i OECD “Çmimet shfrytëzuese në kohën e COVID-19”¹.

II. Analiza e konkurrencës

II. 1 Tregu përkatës

12. Tregu përkatës i produktit përfshin të gjitha ato mallra dhe/ose shërbime të cilat vlerësohen si të këmbyeshme ose të zëvendësueshme nga konsumatori, për arsye të karakteristikave të prodhimit, çmimeve dhe qëllimit të përdorimit të tyre. Kriteret për përcaktimin e tregut përkatës janë: zëvendësueshmëria nga ana e kërkesës, zëvendësueshmëria nga ana e ofertës, konkurrenca potenciale dhe barrierat e hyrjes në treg.
13. Bazuar në Vendimin e Komisionit të Konkurrencës nr. 716, datë 15.10.2020 “Për hapjen procedurës së hetimit të thelluar ndaj disa ndërmarrjeve, në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe gel dezinfektues, në tregun e importit dhe tregtimit me shumicë të termometrave”, tregu përkatës i produktit përfshin:
- Tregun e importit dhe tregtimit me shumicë të maskave;
 - Tregun e importit, prodhimit dhe tregtimit me shumicë të alkooleve dhe gel dezinfektues;
 - Tregun e importit dhe tregtimit me shumicë të termometrave.
14. Përkufizimi i tregut për një produkt/shërbim merr parasysh efektin e zëvendësueshmërisë së produktit/shërbimit (në anën e kërkesës dhe ofertës).
15. Zëvendësueshmëria në anën e kërkesës nënkupton masën në të cilën produktet mund të konsiderohen si të këmbyeshëm nga këndvështrimi i prodhuesve ose i konsumatorëve. Politika e vendosjes së çmimeve të një firme për një produkt të caktuar disiplinohet nëse konsumatorët e kanë mundësinë të blejnë një produkt tjetër i cili, sipas vlerësimit të tyre është i barasvlefshëm për nga natyra, përdorimi dhe/ose çmimi.
16. Zëvendësueshmëria në anën e ofertës ndodh në rastin kur kufizimi konkurrues shtesë mbi një firmë mund të vijë nga prodhuesit e produkteve të tjera që e kanë mundësinë të ndërrojnë destinacionin e prodhimit të tyre pa vonesa për të prodhuar produktet në fjalë me një kosto të papërfillshme dhe janë të gatshëm të hyjnë në konkurrencë në segmentin e tregut përkatës.
17. Oferta në treg për produktet maska dhe termometër, sigurohet nga importi i realizuar nga ndërmarrjet në hetim, ndërsa produktet alkoool dhe gel dezinfektues prodhohen në vend dhe/ose importohen.
18. Nisur nga sa më sipër, tregje përkatëse të produktit do të konsiderojmë:

¹ <https://www.oecd.org/daf/competition/Exploitative-pricing-in-the-time-of-COVID-19.pdf>

- i.tregu i importit dhe tregtimit me shumicë të maskave;
- ii.tregu i importit, prodhimit dhe tregtimit me shumicë të alkooleve dhe gel dezinfektues;
- iii.tregu i importit dhe tregtimit me shumicë të termometrave.

19. Tregu përkatës gjeografik përfshin zonën në të cilën ndërmarrjet janë përfshirë në ofertën dhe kërkesën e shërbimit, në të cilën kushtet e konkurrencës janë mjaftueshmërisht homogjene.
20. Të gjitha ndërmarrjet janë aktive në tregjet e produktit, furnitorët dhe klientët e tyre ndodhen në të gjithë territorin e Republikës së Shqipërisë. Për vlerësimin e konkurrencës, treg gjeografik do të konsiderohet i gjithë territori i Republikës së Shqipërisë.

III. Analiza e sjelljes së ndërmarrjeve në tregun përkatës

III.1 Analiza e tregut të importit dhe tregtimit me shumicë të maskave

21. Produkti maska është një nga produktet e nevojshme për përballimin e situatës së krijuar nga epidemia e COVID-19, gjatë gjithë kohëzgjatjes së epidemisë. Referuar të dhënave teknike dhe cilësore të tyre, maskat janë ndarë në katër kategori: maskë respiratore me nivel mbrojtës FFP3, maskë respiratore me nivel mbrojtës FFP2 (N95), maskë kirurgjikale e thjeshtë dhe maskë prej pëlhere.
22. Ndërmarrja Farmanet SHPK, përgjatë periudhës në hetim ka tregtuar 28 lloje të ndryshme maskash dhe ka shitur një sasi prej 1,688,661 copë maska.
23. Ndërmarrja Farmanet SHPK ka tregtuar produktin maska vetëm në periudhën 1 mars 2020 – 31 gusht 2020 dhe periudhën 1 shtator 2020 – 31 dhjetor 2020. Nga analiza konstatohet për produktin Maska KN95 pa Valvul ka patur rritje të çmimit të shitjes gjatë periudhës së tretë.
24. Në përfundim të vlerësimit të sjelljes së ndërmarrjeve në tregun e importit dhe tregtimit me shumicë të maskave nuk konstatohet ekzistenca e një sjelljeje të bashkërenduar midis ndërmarrjeve për tregtimin e produktit maskë, e cila ka si objekt dhe si pasojë kufizimin dhe shtrembërimin e konkurrencës në treg, në kuptim të nenit 3, pika 4, nenit 4, pika 1 e ligjit nr. 9121, datë 28.07.2003, “Për mbrojtjen e konkurrencës”, i ndryshuar.

III.2 Analiza e tregut të importit, prodhimit dhe tregtimit me shumicë të alkooleve dhe gel dezinfektues

III.2.1 Analiza e tregut të importit, prodhimit dhe tregtimit me shumicë të alkooleve

25. Produkti alkool është një nga produktet e nevojshme për përballimin e situatës së krijuar nga epidemia COVID-19. Referuar të dhënave teknike, alkooli ndahet në disa lloje të cilat ndryshojnë nga njëra tjetra në bazë të gradës dhe sasisë në paketim.
26. Ndërmarrja Farma Net Albania SHPK ka tregtuar 10 lloje të produktit alkool për periudhën nëntor 2019 – dhjetor 2020, me një sasi totale të shitur prej 35 065 copë.

27. Ndërmarrja Farma Net Albania SHPK ka tregtuar produktin alkool në periudhën 1 nëntor 2019 – 29 shkurt 2020, periudhën 1 mars 2020 – 31 gusht 2020 dhe periudhën 1 shtator 2020 – 31 dhjetor 2020. Nga analiza konstatohet se çmimi i shitjes për produktin alkool në periudhën e tretë ka qenë në ulje.
28. Në përfundim të vlerësimit të sjelljes së ndërmarrjeve në tregun e importit, prodhimit dhe tregtimit me shumicë të alkoolit nuk konstatohet ekzistenca e sjelljeje të bashkërenduar midis ndërmarrjeve për tregtimin e produktit alkool, e cila ka si objekt dhe si pasojë kufizimin dhe shtrembërimin e konkurrencës në treg, në kuptim të nenit 4, pika 1 e ligjit nr. 9121, datë 28.07.2003, “Për mbrojtjen e konkurrencës”, i ndryshuar.

III.2.2 Analiza e tregut të importit, prodhimit dhe tregtimit me shumicë të gel dezinfektues

29. Produkti gel dezinfektant është një nga produktet e nevojshme për përballimin e situatës së krijuar nga epidemia COVID-19. Referuar të dhënave teknike, produkti gel dezinfektant ndahet në disa lloje të cilat ndryshojnë nga njëra tjetra në bazë të sasisë së paketuar.
30. Ndërmarrja Farma Net Albania SHPK ka tregtuar 32 lloje dezinfektantësh, ndër të cilët kanë qenë më të shitur 9 lloje: Dezinfektant alkoolik spray 100ML, Gel Antibacterial 1L Hand Sanitizer, Gel Hand Sanitizer 1L Me Pompë, Gel Hand Sanitizer 100ML, Gel Hand Sanitizer 100ML/80ML, Gel Hand Sanitizer 200ML, Gel Hand Sanitizer 500ML (Eagle), SoClean Antibacterial 80 ML dhe Xhel Antibakterial 110ML FNA.
31. Ndërmarrja Farma Net Albania SHPK ka tregtuar produktin gel dezinfektant në periudhën 1 mars 2020 – 31 gusht 2020 dhe periudhën 1 shtator 2020 – 31 dhjetor 2020. Nga analiza e mësipërme vihet re se çmimi i shitjes ka qenë në ulje nga periudha e dytë në periudhën e tretë.
32. Në përfundim të vlerësimit të sjelljes së ndërmarrjeve në tregun e importit, prodhimit dhe tregtimit me shumicë të gel dezinfektant nuk konstatohet ekzistenca e sjelljeje të bashkërenduar midis ndërmarrjeve për tregtimin e produktit gel dezinfektant, e cila ka si objekt dhe si pasojë kufizimin dhe shtrembërimin e konkurrencës në treg, në kuptim të nenit 3, pika 4, nenit 4, pika 1 e ligjit nr. 9121, datë 28.07.2003, “Për mbrojtjen e konkurrencës”, i ndryshuar.

III.3 Analiza e tregut të importit dhe tregtimit me shumicë të termometrave

33. Produkti termometër infrared është një nga produktet e nevojshme për përballimin e situatës së krijuar nga epidemia e COVID-19, gjatë gjithë kohëzgjatjes së epidemisë.
34. Bazuar në të dhënat e administruara, rezulton se ndërmarrja Farma Net Albania SHPK ka tregtuar 5 lloje të produktit termometër për periudhën nëntor 2019 – dhjetor 2020, me një total shitjesh prej 1126 copë.
35. Ndërmarrja Farma Net Albania SHPK ka tregtuar produktin termometër në periudhën 1 mars 2020 – 31 gusht 2020 dhe 1 shtator 2020 – 31 dhjetor 2020. Nga analiza e çmimit të shitjes

vihet re një rritje çmimi përgjatë periudhës së dytë.

36. Në përfundim të vlerësimit të sjelljes së ndërmarrjeve në tregun e importit dhe tregtimit me shumicë të termometër nuk konstatohet ekzistenca e sjelljeje të bashkërenduar midis ndërmarrjeve për tregtimin e produktit termometër infrared, e cila ka si objekt dhe si pasojë kufizimin dhe shtrembërimin e konkurrencës në treg, në kuptim të nenit 3, pika 4, nenit 4, pika 1 e ligjit nr. 9121, datë 28.07.2003, “Për mbrojtjen e konkurrencës”, i ndryshuar.

IV. Zbatimi i masës së përkohshme

37. Komisioni i Konkurrencës me Vendimin nr. 684, datë 18.03.2020 “Për hapjen e hetimit paraprak në tregun e shitjes me shumicë dhe me pakicë të materialeve paramjekësore”, vendosi hapjen e procedurës së hetimit paraprak në tregun e shitjes me shumicë dhe me pakicë të materialeve paramjekësore, për të parë nëse ka, ose jo, shenja të kufizimit të konkurrencës.
38. Komisioni i Konkurrencës me Vendimin nr. 685, datë 18.03.2020 “Për marrjen e masës së përkohshme për vendosjen e konkurrencës në tregun e shitjes me shumicë dhe me pakicë të materialeve paramjekësore”, vendosi:
- i. Marrjen e masës së përkohshme si vijon:
 - a. Ndalimin e sjelljes së ndërmarrjeve që veprojnë në rrjetin e tregtimit me shumicë dhe pakicë (importues, depo farmaceutike dhe farmaci) të materialeve paramjekësore, të cilat në mënyrë të drejtpërdrejtë apo të tërthortë vendosin çmime apo kushte të padrejta tregtimi.
 - b. Me qëllim shmangien e abuzimit në zinxhirin e tregtimit, detyrimin e të gjitha ndërmarrjeve që veprojnë në tregun e importit dhe shitjes me shumicë të materialeve paramjekësore të jenë transparent në vendosjen e çmimit të shitjes së materialeve dezinfektant, alkool dhe maska.
 - c. Aplikimin e çmimeve të orientuara drejt kostos dhe publikimit e tyre në faqet zyrtare të internetit të ndërmarrjeve apo në kanalet e tjera të komunikimit.
 - ii. Masa e përkohshme merret për një periudhë kohore deri në përfundim të procedurës hetimore.
 - d. Në rast të moszbatimit të vendimit për masa të përkohshme të cituara në pikën (1) të këtij vendimi, ndërmarrjet që do të konstatohen në shkelje ndëshkohen me gjobë deri në 10 % të xhiros vjetore për shkelje të rëndë të konkurrencës në zbatim të nenit 74, pika 1, germa b) të ligjit nr. 9121/2003.
39. Në kuadër të vlerësimit të masës së përkohshme, gjatë procedurës së hetimit paraprak, referuar informacionit të administruar pranë AK, është analizuar sjellja e ndërmarrjeve që operojnë në tregun e tregtimit me shumicë të materialeve paramjekësore për produktet maska, alkool dhe gel-dezinfektant.
40. Komisioni i Konkurrencës në vijim të procedurave të mësipërme u shpreh me Vendimin nr. 717, datë 15.10.2020 “Për vendosje gjobe dhe dhënien e disa detyrimeve ndaj disa ndërmarrjeve për mos zbatimin e masës së përkohshme të Vendimit nr. 685, datë 18.03.2020 “Për marrjen e masës së përkohshme për vendosjen e konkurrencës në tregun e shitjes me

shumicë dhe me pakicë të materialeve paramjekësore”’).

41. Në zbatim të pikës IV të Vendimit nr. 717, datë 15.10.2020, të dhënat e siguruar në formë fizike dhe elektronike për periudhën 1 janar 2020 deri në 31 maj 2020 janë përpunuar nga inspektorët e Autoritetit të Konkurrencës, duke krahasuar deklaratat e subjektit me shitblerjet e realizuara nga ndërmarrjet Farma Net Albania SHPK.
42. Në zbatim të pikës 3 të Vendimit nr. 685, datë 18.03.2020 “Për marrjen e masës së përkohshme për vendosjen e konkurrencës në tregun e shitjes me shumicë dhe me pakicë të materialeve paramjekësore”, të dhënat e administruara pranë AK referuar shkresës sonë nr. 110/84 prot., datë 09.12.2020 “Kërkesë për informacion” u përpunuan nga inspektorët e Autoritetit të Konkurrencës, për periudhën 1 qershor 2020 – 31 dhjetor 2020 për ndërmarrjen Farma Net Albania SHPK.
43. Bazuar në të dhënat e administruara, rezulton se ndërmarrja Farma Net Albania SHPK ka tregtuar 10 lloje të produktit alkool, 15 lloje të produktit maska dhe 26 lloje të produktit dezinfektant për periudhën qershor 2020 – dhjetor 2020. Në analizën për vlerësimin e masës së përkohshme janë marrë në shqyrtim 2 lloje alkoolësh për të cilët sasia e shitur është mbi 2000 copë, 7 lloje maskash për të cilat sasia e shitur është mbi 5000 copë si edhe 6 lloje dezinfektantësh për të cilët sasia e shitur është mbi 500 copë.
44. Ka realizuar shitje të produktit *Alkool Etilik I Cnatyruar 70 _Il* me një total prej 17 138 copë për periudhën qershor 2020 – dhjetor 2020. Në qershor 2020 ky produkt është blerë mesatarisht me 236.2 lekë/copë dhe është shitur mesatarisht me 643.7 lekë/copë. Në korrik 2020 ky produkt është blerë mesatarisht me 266.7 lekë/copë dhe është shitur mesatarisht me 460.3 lekë/copë. Në gusht 2020 ky produkt është blerë mesatarisht me 266.7 lekë/copë dhe është shitur mesatarisht me 479.1 lekë/copë. Në shtator 2020 ky produkt është blerë mesatarisht me 262.8 lekë/copë dhe është shitur mesatarisht me 393.8 lekë/copë. Në tetor 2020 ky produkt është blerë mesatarisht me 266.6 lekë/copë dhe është shitur mesatarisht me 391.8 lekë/copë. Në nëntor 2020 ky produkt është blerë mesatarisht me 273.6 lekë/copë dhe është shitur mesatarisht me 409.6 lekë/copë. Në dhjetor 2020 ky produkt është blerë mesatarisht me 283.3 lekë/copë dhe është shitur mesatarisht me 377.6 lekë/copë. Për këtë produkt konstatohet rritje çmimi në muajt qershor 2020, gusht 2020 dhe nëntor 2020.
45. Ka realizuar shitje të produktit *Alkool Etilik I Cnatyruar 90 _Il* me një total prej 3 095 copë për periudhën qershor 2020 – dhjetor 2020. Në qershor 2020 ky produkt është blerë mesatarisht me 250 lekë/copë dhe është shitur mesatarisht me 370.6 lekë/copë. Në korrik 2020 ky produkt është blerë mesatarisht me 250 lekë/copë dhe është shitur mesatarisht me 632.7 lekë/copë. Në gusht 2020 ky produkt është blerë mesatarisht me 250 lekë/copë dhe është shitur mesatarisht me 384.1 lekë/copë. Në shtator 2020 ky produkt është blerë mesatarisht me 253.8 lekë/copë dhe është shitur mesatarisht me 378.2 lekë/copë. Në tetor 2020 ky produkt është blerë mesatarisht me 250 lekë/copë dhe është shitur mesatarisht me 360.2 lekë/copë. Në nëntor 2020 ky produkt është blerë mesatarisht me 250 lekë/copë dhe është shitur mesatarisht me 381.5 lekë/copë. Në dhjetor 2020 ky produkt është blerë mesatarisht me 252.3 lekë/copë dhe është shitur mesatarisht me 375.8 lekë/copë. Për këtë produkt konstatohet rritje e çmimit në muajin korrik 2020 dhe nëntor 2020.

46. Ka realizuar shitje të produktit *Maska Kn95 (Maxsharer)* me një total prej 119 610 copë për periudhën qershor 2020 – dhjetor 2020. Në qershor 2020 dhe korrik 2020 ky produkt nuk është tregtuar. Në gusht 2020 për këtë produkt janë realizuar vetëm blerje me çmim mesatar prej 19.9 lekë/copë. Në shtator 2020 ky produkt është blerë mesatarisht me 19.8 lekë/copë dhe është shitur mesatarisht me 252.2 lekë/copë. Në tetor 2020 për këtë produkt janë realizuar vetëm blerje me një çmim mesatar prej 19.8 lekë/copë. Në nëntor 2020 për këtë produkt nuk janë realizuar blerje por është shitur mesatarisht me 80 lekë/copë. Në dhjetor 2020 për këtë produkt nuk janë realizuar blerje por është shitur mesatarisht me 298.9 lekë/copë. Për këtë produkt konstatohet rritje në muajt shtator 2020 dhe dhjetor 2020.
47. Ka realizuar shitje të produktit *Maska Kn95 Me Valvul (Kine)* me një total prej 111 651 copë për periudhën qershor 2020 – dhjetor 2020. Në qershor 2020 ky produkt është blerë mesatarisht me 265.6 lekë/copë dhe është shitur mesatarisht me 458.2 lekë/copë. Në korrik 2020 për këtë produkt nuk janë realizuar blerje por është shitur mesatarisht me 583.6 lekë/copë. Në gusht 2020 për këtë produkt nuk janë realizuar blerje por është shitur mesatarisht me 292.1 lekë/copë. Në shtator 2020 për këtë produkt nuk janë realizuar blerje por është shitur mesatarisht me 331.1 lekë/copë. Në tetor 2020 për këtë produkt nuk janë realizuar blerje por është shitur mesatarisht me 424.6 lekë/copë. Në nëntor 2020 për këtë produkt nuk janë realizuar blerje por është shitur mesatarisht me 251.8 lekë/copë. Në dhjetor 2020 për këtë produkt nuk janë realizuar blerje por është shitur mesatarisht me 250 lekë/copë. Për këtë produkt konstatohet rritje e çmimit në muajin qershor 2020, korrik 2020 dhe tetor 2020.
48. Ka realizuar shitje të produktit *Maske Pa Valvul FFP2 (NOBLE&CO)* me një total prej 141 790 copë për periudhën qershor 2020 – dhjetor 2020. Në qershor 2020 dhe korrik 2020 ky produkt nuk është tregtuar. Në gusht 2020 ky produkt është blerë mesatarisht me 115.2 lekë/copë dhe është shitur mesatarisht me 260 lekë/copë. Në shtator 2020 ky produkt është blerë mesatarisht me 62 lekë/copë dhe është shitur mesatarisht me 260 lekë/copë. Në tetor 2020 dhe nëntor 2020 ky produkt nuk është tregtuar. Në dhjetor 2020 ky produkt është blerë mesatarisht me 39.8 lekë/copë dhe është shitur mesatarisht me 219.1 lekë/copë. Për këtë produkt konstatohet një diferencë e konsiderueshme midis çmimit mesatar të blerjes dhe atij të shitjes gjatë muajve në të cilët është tregtuar.
49. Ka realizuar shitje të produktit *Gel Hand Sanitizer 500 Ml (Eagle)* me një total prej 27 543 copë për periudhën qershor 2020 – dhjetor 2020. Në qershor 2020 ky produkt është blerë mesatarisht me 250 lekë/copë dhe është shitur mesatarisht me 382.8 lekë/copë. Në korrik 2020 ky produkt është blerë mesatarisht me 250 lekë/copë dhe është shitur mesatarisht me 368.4 lekë/copë. Në gusht 2020 për këtë produkt nuk janë realizuar blerje por është shitur mesatarisht me 434.3 lekë/copë. Në shtator 2020 ky produkt është blerë mesatarisht me 233.3 lekë/copë dhe është shitur mesatarisht me 373.1 lekë/copë. Në tetor 2020 ky produkt është blerë mesatarisht me 250 lekë/copë dhe është shitur mesatarisht me 413.7 lekë/copë. Në nëntor 2020 ky produkt është blerë mesatarisht me 219.6 lekë/copë dhe është shitur mesatarisht me 454.5 lekë/copë. Në dhjetor 2020 ky produkt është blerë mesatarisht me 216.7 lekë/copë dhe është shitur mesatarisht me 358.3 lekë/copë. Për këtë produkt konstatohet rritje çmimi në muajt gusht 2020, shtator 2020 dhe tetor 2020.

50. Ndërmarrja Farma Net Albania SHPK, për produktet Alkool Etilik I Cnatyruar 70 _11, Alkool Etilik I Cnatyruar 90 _11 , Maska Kn95 (Maxsharer), Maska Kn95 Me Valvul (Kine), Maske Pa Valvul FFP2 (NOBLE&CO), Gel Hand Sanitizer 500 Ml (Eagle) rezulton se për periudhën 1 qershor – 31 dhjetor 2020, nuk ka zbatuar Vendimin e Komisionit të Konkurrencës nr. 685, datë 18.03.2020 “Për marrjen e masës së përkohshme për vendosjen e konkurrencës në tregun e shitjes me shumicë dhe me pakicë të materialeve paramjekësore”.
51. Ndërmarrja Farmanet SHPK, për produktet Alkool Etilik I Cnatyruar 70 _11, Alkool Etilik I Cnatyruar 90 _11 , Maska Kn95 (Maxsharer), Maska Kn95 Me Valvul (Kine), Maske Pa Valvul FFP2 (NOBLE&CO), Gel Hand Sanitizer 500 Ml (Eagle) rezulton se për periudhën 1 qershor – 31 dhjetor 2020, nuk ka zbatuar Vendimin e Komisionit të Konkurrencës nr. 685, datë 18.03.2020 “Për marrjen e masës së përkohshme për vendosjen e konkurrencës në tregun e shitjes me shumicë dhe me pakicë të materialeve paramjekësore”.
52. Bazuar në Rregulloren “Për procedurat e angazhimeve”, e cila ka për objekt përcaktimin e rregullave dhe të procedurave që zbatohen në rastet e përfundimit dhe mbylljes së procedurave hetimore nëpërmjet vendimeve me angazhime, në përputhje me nenin 45 të ligjit nr. 9121/2003, ndërmarrja Farma Net Albania SHPK ka paraqitur vullnetarisht angazhimet e saj me qëllim zgjidhjen e shqetësimeve të ngritura të konkurrencës në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe geldezinfektues, në tregun e importit dhe tregtimit me shumicë të termometrave si dhe mbajtjen dhe respektimin e tyre për të gjithë periudhën e konsideruar të nevojshme nga ana e Autoritetit.
53. Konkretisht ndërmarrja Farma Net Albania SHPK ka depozituar angazhimet si më poshtë vijon:
- i. Ndërmarrja FARMA NET ALBANIA SHPK nuk do të bëjë asnjë marrëveshje të cilat kanë si objekt ose si pasojë pengimin, kufizimin ose shtrembërimin e konkurrencës në treg, veçanërisht marrëveshjet që:*
- a) caktojnë, në mënyrë të drejtpërdrejtë ose të tërthortë, çmimet e blerjes ose të shitjes, apo çdo kusht tjetër tregtimi;*
 - b) kufizojnë ose kontrollojnë prodhimin, tregjet, zhvillimin teknik ose investimet;*
 - c) ndajnë tregjet ose burimet e furnizimit;*
 - d) në marrëdhëniet tregtare me palët e tjera, zbatojnë kushte të ndryshme për transaksione të njëjta, duke i vendosur ato në gjendje të pafavorshme konkurrence;*
 - e) kushtëzojnë lidhjen e kontratave me pranimin nga palët e tjera kontraktuese të detyrimeve shtesë që, për nga natyra ose nga përdorimi i tyre tregtar, nuk kanë lidhje me objektin e këtyre kontratave.*
- ii. Ndërmarrja FARMA NET ALBANIA SHPK, nuk do të realizojë:*
- a) vendosjen, në mënyrë të drejtpërdrejtë ose të tërthortë, e çmimeve të padrejta të blerjes ose shitjes apo e kushteve të tjera të padrejta të tregtimit;*
 - b) kufizimin e prodhimit, tregjeve ose zhvillimit teknik;*
 - c) zbatimin e kushteve të pabarabarta për veprime tregtare të njëjta me palët, duke i vendosur ato në gjendje të pafavorshme konkurrence;*
 - d) vendosjen e kushteve për lidhjen e kontratave me palët e tjera, që këto të fundit të pranojnë*

detyrime shtesë, të cilat, për vetë natyrën e tyre ose sipas praktikave tregtare, nuk kanë lidhje me objektin e kontratave në fjalë.

54. Në zbatim të Rregullores “Mbi procedurat e angazhimeve”, angazhimet e mësipërme janë marrë nga ndërmarrja nën hetim për gjithë periudhën kohore në të ardhmen.
55. Autoriteti Konkurrencës, pavarësisht se ka përfunduar procedurat hetimore në tregun e importit dhe tregtimit me shumicë të maskave, tregun e importit, prodhimit dhe tregtimit me shumicë të alkooleve dhe geldezinfektues dhe tregun e importit dhe tregtimit me shumicë të termometrave, vlerëson se angazhimet janë të qarta, të vetekzekutueshme si dhe janë depozituar vullnetarisht nga ndërmarrja Farma Net Albania SHPK si dhe angazhimet kanë natyrë sjellje, d.m.th. çmimet do të jenë të orientuara drejt kostos, do të jenë transparente, si dhe sjellja e ndërmarrjes Farma Net Albania SHPK do të jetë në përputhje me ligjin nr. 9121/2003 “Për mbrojtjen e konkurrencës”, i ndryshuar, në veçanti me nenin 4.

PËR KËTO ARSYE:

Komisioni i Konkurrencës, bazuar në nenin 24, shkronja (d), nenin 26, nenin 43, pika (5) dhe nenin 45, pika (2) të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe Rregulloren “Mbi procedurat e angazhimeve”,

VENDOSI:

- I. Mbylljen e procedurës së hetimit të thelluar në tregun e importit dhe tregtimit me shumicë të maskave, në tregun e importit, prodhimit dhe tregtimit me shumicë të alkooleve dhe geldezinfektues, në tregun e importit dhe tregtimit me shumicë të termometrave.
- II. Miratimin e angazhimeve të depozituara nga ndërmarrja Farma Net Albania SHPK, si të detyrueshme në formën e kushteve dhe detyrimeve.
- III. Ndërmarrja Farma Net Albania SHPK ka detyrimin ligjor të mos bëjë marrëveshje dhe/ose praktika të bashkërenduara, të cilat kanë si objekt ose pasojë pengimin, kufizimin ose shtrembërimin e konkurrencës në treg, veçanërisht:
 - a. të caktojnë, në mënyrë të drejtpërdrejtë ose të tërthortë, çmimet e blerjes ose të shitjes, apo çdo kusht tjetër tregtimi;
 - b. të kufizojnë ose kontrollojnë prodhimin, tregjet, zhvillimin teknik ose investimet;
 - c. të ndajnë tregjet ose burimet e furnizimit;
 - d. në marrëdhëniet tregtare me palët e tjera, zbatojnë kushte të ndryshme për transaksione të njëjta, duke i vendosur ato në gjendje të pafavorshme konkurrence;
 - e. të kushtëzojnë lidhjen e kontratave me pranimin nga palët e tjera kontraktuese të detyrimeve shtesë që, për nga natyra ose nga përdorimi i tyre tregtar, nuk kanë lidhje me objektin e këtyre kontratave.
- IV. Në rast të mos përmbushjes së kushteve dhe detyrimeve të përcaktuara në dispozitivin e këtij vendimi, ndërmarrja Farma Net Albania SHPK në zbatim të nenit 76, pika 1, germa (a) të ligjit nr. 9121/2003 ndëshkohet me penalitetin përkatës.

V. Monitorimin e zbatimit të këtij vendimi për një periudhë 1 vjeçare për të gjitha angazhimet e marra nga ndërmarrja Farma Net Albania SHPK.

VI. Ngarkohet Sekretari i Përgjithshëm për njoftimin e këtij vendimi.

Ky vendim hyn në fuqi menjëherë.

KOMISIONI I KONKURENCËS